

Tiltuv

Gevq-a nail gaq

Haoqgavq niil keiv iqmoeq ilmoeq bhai Gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq jemaos iqsanl, Paolluv-i mail gevq-a nail ngaol dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 63-65 kovq bhai ngaol. Paolluv iqmoeq-u phao thaonq nee dov lee khi pultavq gevq-a nail ngaol. Gevq-a nail aqduq neq, Gaolliqthu meenq bhai pevq nia nail ngaol.

Khaq sil gaq bhai gevq bhiq-a nail

Haoqgavq niil keiv neq, Tiltuv bhai gevq bhiq-a nail ngaol. Tiltuv dai ge nail daoqceevq neq, "Aqphoiq" dai, ge movq nail ngaol. Tiltuv neq, Heiqlaqsal tsaol-aq ngaol. Tilmolseiq khe-ai, Gaqkhoel Paolluv lavqkhiq tsail nail geeqlaoq daoq cavq nail bhai ya gaiq khi, Khali yaq pevq lal-a nail ngaol. A bhai nee ngal-aq, Paolluv nail ganl nl tsaq teevq gaq pevq lal-a nail ngaol.

Paolluv Lolmav nail thaonq bhai iqmoeq ilmoeq khe pov aol khi dov lal-al nee ngal-aq, Tiltuv nee mail Gaqlaqdeiq eeljaollaol-n bhai ganl teevq yanq nl tavq-a nail ngaol. A bhai nee ngal-aq, maq nl gil thaq nail ganl bhi nl gil nail dai khi, Tiltuv bhai neq, a bhai bhi jaol-ail ceevq-a nail ngaol.

Khul bhai noeqthunq khi gevq-a nail

Paolluv Tiltuv bhai Gaqlaqdeiq eeljaollaol-n khe Khali yaq munl bhai khalhai ya heldaiq phail nail dai, gaq bivq nail nee ovqtavq, maq nl gil thaq nail ganl juq nl gil yaoq dai, gevq bhiq-a nail ngaol.

Al taivq-ail maq ngel nail, Khali yaq munl bhai heldaiq phail nail neq, Khali yaq bhai maq ngel nail phaqaq cavq lal nail juq nail haoqnao maq bhi tsaother-aiqv dai, Khali yaq neema thaqtsaol nail maldil tsaq nail phaqaq bhai ya cavq ya cov bhiq naol dai, gaq bivq nail haqbhoil gevq-a nail ngaol.

Al ovqtavq, Gaqlaqdeiq eeljaollaol-n bhai jaol nail tsaol-aq neq, saljial maq ivq, maq meeq maq haol nail phaqaq nl nail, aqdoil doil nail ngel-i mail, cavq bheeq nail juq nail haoqnao maq bhi tsaother-aiqv nail haqbhoil, neema thaqtsaol nail phaqaq gaq kav lal dai, aqyu juq bhai mailma-ail cavq bhiq cov bhiq yaoq dai iqsanl, Tiltuv bhai gevq bhiq-a nail ngaol.

Iqmoeq ilmoeq khe daoq

¹ Ngal neq, Miqyail nail yaqkav khi mail Yeiqsul Khali nail gaqkhoel pevq nail Paolluv ngaol. Miqyail-i mail tsel dov-ai thaq nail tsaol-aq nail neema thaqtsaol nail phaqaq gaq bhi kav lal nail nee ovqtavq, Miqyail bhai ev nail phaqaq bhi dov lal nail maldil tsaq nail phaqaq bhai aqyu juq heeq nia lal dai, ngal Yeiqsul Khali nail gaqkhoel jioqv thailthaiq nail ngaol. ² Ngal bivq naol dai, goiqb-haoq maq bhaoq nail Miqyail aq-u nee mail ge-ai

thaq nail nqmaq maqluv halyeel doevq nail pha q bhai, aqyu juq noeqthunq noeqthunq-ail jaol nia lal dai iqsanl, ngal gaqkhoel jiovq thailthaiq nail ngaol. ³ Aqyanq tsaq lal-u phao, nqmaq maqluv halyeel doevq nail ganl al, Miqyail ngadao juq bhai phaodaiq lavq-a nail ngaol. “Ganl al cavq bhiq dei-eiq” dai, ngadao nail Hevqkovq nail gaq pevq nail Miqyail ngaq bhai daoq bivq lavq khi, av lavq-a nail ngaol.

⁴ Neema thaqtsaol nail pha q ngaq-ai nee teevq daoq bhai tavq nail ngaq nail yaqyov khe-ai dul nail Tiltuv bhai haoqgavq niil gevq bhoel-ai leevq-a nail ngaol. Aqbhu Miqyail khi mail ngadao nail Hevqkovq nail gaq pevq nail Yeiqsul Khali nail geeqlaoq eeljaol khi mail neesal-ovq nail pha q, naoq nail kovtavq bhai jia v dei-eiq.

Gaqlaqdeiq eeljaol laol-n bhai Tiltuv-i mail ganl nl-a nail

⁵ Ngal naoq bhai ge tha q-ail ceevq-a nail khe-ai, maq nl gil-a nail juq bhi nl gil nail dai khi ovqtavq, yaoq meenq yaoq-ao nee mail jaol nail Khali yaq munl bhai heldaiq phail nail aqivq aqtsu juq bhi tsel dov nail dai khi mail, ngal naoq bhai Gaqlaqdeiq eeljaollaol-n bhai bhi jaol-ail ceevq-a nail ngaol. ⁶ Khali yaq munl bhai heldaiq phail nail aqivq ga q neq, oeqbal tha q duq maq jia v nail tsaol-aq khi mail, khaqma teevq ga q taivq-ail bhao nail tsaol-aq ya pevq nail ngaol. Aqyu juq nail yaq juq iqsanl Yeiqsul bhai neema tha qtsaol nail tsaol-aq ya pevq nail ngaol. Yu ge duq maq jia v dai, aqdoevq doevq nail yaq juq pevq nail nee ovqtavq, daoq naldaiq

nail yaq juq ya pevq nail ngaol. ⁷ Khali yaq munl bhail heldaiq phail nail gaq neq, Miqyail nail nlmaoq bhail heldaiq phail nail gaq pevq nail ngel-i mail, oeqbal thaq duq maq jiav nail tsaol-aq ya pevq nail ngaol. Yovqgavq nail neenoq taivq-ail oil nail tsaol-aq, neema davqnil nil nail tsaol-aq, jilphee q daol bov nail tsaol-aq, yu nee deeq pheel deeq lul jaq nail tsaol-aq, phul heel ildaoq maoggaig bhail maivjeel jeel nail tsaol-aq maq ya pevq-ail. ⁸ Daq-i bhail hav nia nail tsaol-aq, aqmeeq pha q bhail gaiq-a nail tsaol-aq, neema ivqdao dai, tha q nia nail tsaol-aq, tsa q nail daol nail tsaol-aq, meeq nail haol nail tsaol-aq, yovqgavq nail neema bhail ga q lai nia nail tsaol-aq ya pevq nail ngaol. ⁹ Aqyu juq-i mail ya saol-a nail khe-ai, saljial ivq nail dao q bhail ivqdao dai nieivq thailq-ai tha q nail ga q ya pevq nail ngaol. Alhail nieivq thailq-ai tha q ha q neq, maldil tsa q nail pha q bhail cavq bhilq nia khi, yu bhail ga q bivq nia nail nee ovqtavq, dao q ma q naldaiq nail tsaol-aq juq bhail, aqyu juq-i mail lai q ail-a nail dao bhail moel nia dai, cavq na q bhilq nia nail tsaol-aq ya pevq nail ngaol.

¹⁰ Khul khi mail dai ngal-aq, dao q ma q naldaiq nail tsaol-aq maodai jaol nail ngaol. Aqyu juq neq, ganl ma q tsoiq nail dao q ge nail nee ovqtavq, yu bhail goiqbhaoq bhaoq bhaoq-ail hevq bhee q nail ngaol. Alhail nl nail tsaol-aq juq neq, yu nee maqtsil, Yuldav tsaol-aq nail aolsaolkovq nee Khali ya q phao phal lal khi ngaol-aq aol al juq bhail ga oq tha oq movq nail juq nail lavqkhoel bhail jaol nail ngaol. ¹¹ Naol aqyu juq bhail heeq tsul dai, bhi jaol yaoq. Khul

khi mail dai ngal-aq, aqyu juq haqsil nail phaḡ maḡ bhao dai, phul heel halpov khi maḡ tsaḡ nail phaḡ cavḡ bhīḡ cov bhīḡ nail bhaḡda nee, ildaḡ daoḡ lao lao-ail lav luḡ lav seil bhīḡ nail ngaol. ¹² Aqyu juḡ-i mail ge nail Miḡyail nail haḡbhoil gedan nail dai, noeḡ nail tsaol-aḡ teevḡ gaḡ-i mail ge-ai thaḡ nail daoḡ niaillhai jiav nail ngaol. “Gaḡlaḡdeiq eeljaol laol-n bhai jaol nail tsaol-aḡ neḡ, goiḡbhaḡ bhaoḡ nail tsaol-aḡ, haḡeiv nail jaiḡyaḡ khe-ai aḡdoevḡ doevḡ nail tsaol-aḡ, khul teevḡ phaḡ iḡsanl maḡ nl nul dai, al jaiḡ jaḡ bov daol bov nail tsaol-aḡ teevḡ-eel ngaol” dai, ge-ai thaḡ nail ngaol. ¹³ Alhai ge-ai thaḡ nail daoḡ al daoḡ neḡ, tsaḡ nail ngaol. Alheel ngel-i mail, aqyu juḡ nail neema thaḡtsaol nail phaḡ ivḡ lal nia dai, aḡkav kav dai khaḡ khaḡ-ail cavḡ bhīḡ cov bhīḡ yaḡ. ¹⁴ Yuldav tsaol-aḡ nail ganḡje juḡ bhai khi mail, maldil tsaḡ nail phaḡ bhai khaonḡ ha-ail ceevḡ-a nail tsaol-aḡ juḡ nail aoldaoḡ kovḡdaoḡ bhai maḡ ya nl dai, cavḡ bhīḡ cov bhīḡ yaḡ.

¹⁵ Neema lavḡkhoel bhai haol nail tsaol-aḡ nail haḡbhoil neḡ, iḡsanl mail aḡhaol ngaol. Thailhai ngaol-aḡ, neema lavḡkhoel bhai maḡ haol nail tsaol-aḡ khi mail neema maḡ thaḡtsaol nail tsaol-aḡ nail haḡbhoil neḡ, aḡhaol teevḡ phaḡ iḡsanl maḡ jiav-ail. Khul khi mail dai ngal-aq, aqyu juḡ nail neenoeḡ khi mail, heeḡ nia nail neema neḡ, iḡsanl mail aḡjiivḡ aḡcavḡ ngaol. ¹⁶ “Nvjuḡ Miḡyail bhai heeḡ kivḡ naol” dai, aqyu juḡ ge khi ngaol-aḡ, aqyu juḡ-i mail nl nail hal nail bhai heldaiḡ haḡ neḡ, Miḡyail bhai teevḡ peivḡ iḡsanl heeḡ nia nail tsaol-aḡ khe-ai, maḡ dul lal-

ail. Aqyu juq neq, bhe lal heeq pha-q-ail tsaq nail tsaol-aq, daoq maq naldaiq nail tsaol-aq pevq khi, aqmeeq pha-q-nl nail teevq peivq-ail maq geel-nvq-ail.

2

Maldil tsaq nail neema thaqtsaol nail pha-q

¹ Thailhai ngaol-aq, naol neq, maldil tsaq nail pha-q bhai taivq-ail ya cavq ya cov bhiq nail ngaol. ² Aqbhal joiqmaoq juq bhai, yaolphaol nia nail neema aol lal nia dai maqkhaiq, yu ev heeq pha-q-ail doevq nia dai maqkhaiq, neema ivqdao dai, tha-q nia dai maqkhaiq, maldil tsaq nail neema thaqtsaol nail pha-q aol lal dai maqkhaiq, goil nail gaiq-a nail pha-q aol lal dai maqkhaiq, daq tsaol ol tsaol nail neema aol lal nia dai maqkhaiq, cavq bhiq cov bhiq yaoq.

³ Alhai dul dai aqphiq joiqmaoq juq bhai iqsanl, Miqyail bhai ev nail lavqkhoel bhai doevq nia jaol nia dai, cavq bhiq cov bhiq yaoq. Yu nail ganl ge doil nail tsaol-aq khi mail aqheeq tsilju nail ullul al jaiq daol jel nail tsaol-aq maq ya pevq-ail. Aqmeeq pha-q cavq bhiq cov bhiq nia nail tsaol-aq ya pevq nail ngaol. ⁴ Aqyu juq alhai nl haq neq, aqkovq maq jiav lal-a nail yaqmai-aq juq bhai yovqgavq nail yovjil khi mail yaq juq bhai gaiq-a nia lal dai, cav bhiq cov bhiq nail tsaol-aq pevq lal nail ngaol. ⁵ Al ovqtavq, yaqmai-aq al juq, yovqgavq nail neema bhai gaq lai nia nail tsaol-aq, haol nail tsaol-aq, yovqgavq nail ildaoq bhai heldaiq phail nia nail tsaol-aq, neema meeq nail tsaol-aq khi mail yovqgavq nail

yovjil nail kov-uvq bhai jaol nia nail tsaol-aq pevq lal nail ngaol. Aqyu juq alhai pevq lal haq neq, yu Miqyail nail daoq bhai khal ge movq-ail maq ge nia-ail.

⁶ Alhai dul dai, aqkovq maq jiav lal-a nail yaqyov-aq juq bhai iqsanl, yovqgavq nail neema bhai gaq lai nia dai, gaq bivq yaoq. ⁷ Aqyu juq saol oil nia dai, yaoq phaqaq yaoq-ao nee nail lavqkhoel, aqmeeq phaqaq nl daiq bhiq yaoq. Cavq bhiq cov bhiq-u phao, yu ev heeq phaqaq-ail aqhaol haol dai, cavq bhiq cov bhiq yaoq. ⁸ Yu oeqbal thaqaq duqaq maq jiav dai, maldil tsaqaq nail phaqaq bhai tavqaq nail daoqaq cavqaq bhiq cov bhiq yaoq. Alhai cavqaq bhiq cov bhiq haqaq neqaq, ngadao bhai neejiav jiav nail tsaol-aq ngadao bhai khul teevqaq phaqaq iqsanl ge doil nail phaqaq maq jiav dai, ya haqsil nail ngaol.

⁹ Yaqaqav juqaq bhai iqsanl, ilheel gaqaq nail kov-uvqaq bhai aqmeeq-ai jaol khi, yaoqaq phaqaq yaoq-ao nee nail lavqkhoel ilheel gaqaq neekhaol sil dai, nl bhiq khi, daoqaq pov maqaq ya kovqaq lai dai, cavqaq bhiq cov bhiq yaoq. ¹⁰ Al ovqtavqaq, ilheel gaqaq nail yalkav maqaq ya khioqaq ail. Aqyu juqaq bhai, “Saljial ivqaq nail lavqkhoel nee nuljuqaq nail ilheel gaqaq nail ganl bhai aqmeeq-ail nl yaoq” dai iqsanl, cavqaq bhiq cov bhiq yaoq. Alhai nl haqaq neqaq, ngadao bhai Hevqkovqaq nail gaqaq pevqaq nail Miqyail nail ganl cavqaq bhiq cov bhiq nail phaqaq neqaq, yaoqaq phaqaq yaoq-ao nee mao-ail meeqaq lao thaqaq nial dai, bhaqlaoqaq kheqaq dai, dov lal nail ngaol.

¹¹ Khul khi mail dai ngal-aq, tsaol-aq iqsanl bhai hevqkovqaq nail dai khi, Miqyail nail geeqlaoqaq eeljaol dov lee-a nail ngaol. ¹² Geeqlaoqaq eeljaol

al, ngadao bhai niailhai cavq lavq cov lavq-a nail ngaol. Miqyail bhai maq ev nail phaḡ bhai iqsanl, yeel niil yeel khe maivjeel jeel nail juḡ bhai iqsanl khaonḡ ha yaoḡ dai, cavq lavq cov lavq-a nail ngaol. Miltsaq kovtavḡ bhai jaol-u phao, yovḡḡavḡ nail neema bhai gaḡ lai nia nail tsaol-aḡ, aḡsee aḡdaol daol dai, doevḡ nail tsaol-aḡ khi mail Miqyail bhai ev nail tsaol-aḡ pevḡ yaoḡ dai iqsanl, cavq lavq cov lavq-a nail ngaol. ¹³ Ngadao nail eeq dee heel deede nail Miqyail pevḡ nail Hevḡkovḡ nail gaḡ Yeiqsul Khali seiḡleiḡ khaosail nail lavḡkhoel nee dov lee nail geeḡlaoḡ eeq nail aḡn al n bhai noeḡthunḡ khi daonḡ nail haḡbhoil cavq lavq cov lavq nail ngaol. ¹⁴ Yeiqsul neḡ, oeḡbal yaoḡ phaḡ yaoḡ-ao nee nail lavḡkhoel nee ngadao bhai ul kovḡ lavq-a nail nee ovḡtavḡ, aivḡ nail haḡbhoil meeḡ nail haol nail tsaol-aḡ bhiḡ pevḡ lal dai, aivḡ nail aḡmaol laol bhiḡ-a nail ngaol. Tsaol-aḡ al neḡ, aḡmeeḡ phaḡ nl movḡ deede nail neema aol nail ngaol.

¹⁵ Ganl niil juḡ aḡmeeḡ-ai cavḡ bhiḡ cov bhiḡ yaoḡ. Bhaḡaoḡ teevḡ bhee aol nail lavḡkhoel aḡyu juḡ bhai gaḡ bivḡ khi, aḡyu juḡ-i mail nl laiḡ-a nail juḡ bhai cavḡ navḡ bhiḡ yaoḡ. Tsaol-aḡ teevḡ gaḡ iqsanl naoḡ bhai khal ge movḡ-ail, thaḡ bhiḡ ge.

3

Khali yaḡ juḡ khalhai ya doevḡ ya jaol nail ganl

¹ Aḡyu juḡ ganl niil juḡ bhai maḡ ya nioil peivḡ-ail dai, aḡmeeḡ-ai cavḡ bhiḡ cov bhiḡ

yaoq. Heeqphaq juq khi mail uvthaiq nail juq nail kov-uvq bhai aqmeeq-ai jaol yaoq. Aqyu juq nail daoq naldaiq yaoq. Aqmeeq yaoq pha q yaoq-ao nee ya nl dai, lainq tha q gai yaoq.
² “Teevq ga q bhai iqsanl khal ge movq-ail tha q ge. Tha q jil pheel tha q jil lul ja q. Neema neenuq neebeiv aol khi, yaoq pha q yaoq-ao nee nail lavqkhoel tsaol-a q iqsanl bhai ev yaoq” dai, aqyu juq bhai aqmeeq-ai cavq bhiq cov bhiq yaoq.

³ Khul khi mail dai ge ha q neq, jel lal-u phao, ngadao juq iqsanl, neeno eq neekha ma q aol nail tsaol-a q, daoq ma q naldaiq nail khi mail, gail bhee q bhee q ail-a nail tsaol-a q ngaol. Al ovqtavq, aqsivq ha qjoil phao maivjeel jeel nail pha q khi mail, ma q mee q nail pha q bhai lavqkhiq tsail nail mee nia pha q nail kov-uvq bhai ya qkav jio vq daiq-a nail tsaol-a q ngaol. Aq-u phao, ngadao yu bhai maivjeel jeel khi khoe q lai dai nl-a nail tsaol-a q ngaol. Aq-u yu ngadao bhai neejiav jiav nail nee ovqtavq, ngadao tee vq ga q nee tee vq ga q iqsanl, neejiav jiav-a nail ngaol.

⁴ Thailhai ngaol-a oq, ngadao nail Hevqkovq nail ga q pevq nail Miqyail nail gaoqha q gaiq-a nail pha q khi mail, goil nail gaiq-a nail pha q ngadao bhai phaodaiq lavq-u phao, ⁵ aivq ngadao bhai hevqkovq lavq-a nail ngaol. Ngadao tsa q nail daol nail pha q nl-a nail bha qda nee, hevqkovq lavq-a nail ma q ngel-ail. Aivq ngadao bhai gaoqha q nail ngel-i mail, hevqkovq lavq-a nail ngaol. Meeqnail Haolnail Aqhaqlal lavqkhoel, neema aqsivq phal lal khi doevqyeel aqsivq doevq phal lal-a nail neq, tsiq haol lavq-a nail pha q bhai juq khi aivq ngadao bhai hevqkovq

lal-a nail ngaol. ⁶ Ngadao nail Hevqkovq nail gaq pevq nail Yeiqsul Khali bhai juq khi, Miqyail ngadao nail kovtavq bhai Aqhaqlal Miqyail teevq bhee hoeldav lavq-a nail ngaol. ⁷ Miqyail nail geeqlaoq eeljaol bhaqda nee, ngadao tsaq nail daol nail tsaol-aq pevq lal nail ngel-i mail, nqmaq maqluv halyeel doevq nail pha q bhai noeqthunq noeqthunq-ail, Miqyail nail jaiqbhoil ovq nail tsaol-aq ngaol. ⁸ Daoq al juq neq, saljial ivq nail daoq pevq nail ngaol. Miqyail bhai neema thaqtsaol nail tsaol-aq neq, khaq mao iqsanl, aqmeeq pha q ya nl nail ngaol dai, maq ya nioil peivq-ail dai, ngal naoq bhai aqmeeq-ai bhi cavq bhi cov movq-ail nial. Ganl al juq neq, meeq nail nee ovqtavq, tsaol-aq iqsanl nail haqbhoil ganl tsoiq nail ngaol.

⁹ Thailhai ngaol-a oq, khul nail ganl maq tsoiq nail pha q bhai jil pheeljaq nail juq bhai maqkhaiq, aqceevq ge ge-ail jil pheeljaq nail juq bhai maqkhaiq, iqdaiq iqtsai dov nail juq bhai maqkhaiq, aoldaoq kovqdaoq nail ganl jil pheeljaq nail juq bhai maqkhaiq, gail jao jao yaoq. Khul khi mail dai ngal-aq, ganl al juq neq, khul nail ganl maq tsoiq-ail. Aqnieivq teevq-eel ngaol. ¹⁰ Munl bhoil pav khi, gaoq ail gail ail dai nl nail tsaol-aq juq bhai, teevq pov nvq pov bhee dai, aqmeeq-ai cavq bhiq cov bhiq khi maq naldaiq lavq haq neq, gaoq ail ceiv ceiv yaoq. ¹¹ Alhai nl nail tsaol-aq neq, neema teevq peivq-ail maq daol-ail. Oeqbal nl thailthaiq nail ngaol dai, naol heeq kivq yaoq. Aivq nail oeqbal neq, aivq oeqbal aol naol dai, salkhil pevq nail ngaol.

Paolluv Tiltuv bhai hal-a nail ganl

¹² Aqdeiqmal bhai maq ngel haq neq, Duljil bhai ngal naol jaol nail bhai khoel-ai leevq-u phao, Nilgaolbhaqlil meenq bhai ngaq bhai ya thaoq phuq dai, laijai khi lal yaoq. Khul khi mail dai ngal-aq, coevqjieiv jieiv nail yanq bhai ngal a bhai jaol naol dai, noeq ceiv-ai thaq nail ngaol. ¹³ Aoldaoq kovqdaoq mao-ail heeq nia nail Seiqnal khi mail Aqpaolluv aqyu nvq gaq bhai gailkhaol dov-ail nia dai, laijai khi tsaojao-ai bhiq yaoq. Aqyu nvq gaq khal loq nail, yaoq pha q yaoq-ao nee bhee dai, tsaojao-ai bhiq yaoq. ¹⁴ Yu loq nail pha q bhai tsaojao-ai nia dai, ngadao nail tsaol-aq juq, aqmeeq pha q bhai nl nia lal dai, cav bhiq cov bhiq yaoq. Ganl maq tsoiq nail tsaol-aq maq ya pevq-ail.

Geeqlaoq bivq-a nail daoq

¹⁵ Ngaq-ai nee mail jaol nail tsaol-aq juq iqsanl mail, naoq bhai noeq moel nail ngaol dai, daoq cavq cavq bhoel-ai leevq-a nail ngaol. Yeiqsul bhai neema thaqtsaol nail lavqkhoel nvjuq bhai gaiq-a nail tsaol-aq juq bhai iqsanl, nvjuq noeq moel nail lavqkhoel nee daoq cavq cavq bhoel-ai leevq-a nail ngaol dai, ge gaiq bhiq yaoq. Nuljuq iqsanl nail kovtavq bhai Miqyail nail geeqlaoq eeljaol jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 13 Jul 2024 from source files
dated 29 Jan 2022

aaaba9fd-8172-55cc-ad15-906f43ddb5a5